

INUIT ATAQATIGIIT

INATSISARTUNI



Nuuk, 20.08. 2013

Inatsisartut suleriaasianni § 37 naapertorlugu Naalakkersuisunut apeqquut imaattoq nassiuppara:
(Inatsisartuni ilaasortaq Naaja H. Nathanielsen, Inuit Ataqatigiit)

Apeqquutit:

1)

Naalakkersuisut isumaqarpat innuttaasut uranimik piiaanissamut isorinnittut imaluunniit ernumasut isummatik tunuarsimaartissagaat Siumut nunami maani paartiit anginersarimmassuk?

Apeqquut 1 Naalakkersuisup Jens-Erik Kirkegaardip apriliip 30-ianni aamma aggustip 13-ianni oqaaserisaat tunngavigalugit paasineqassaaq.

"Aallarniutigalugu IA eqqaasillara Siumut ilaatigut qineqqusaarmat akuersaanngilluinnernermit aalajangerneq atorunnaarsinniarlugu – qinersinermilu ajugaalluni. Taamaattumik takorlooruminaatsippara politikkerisaq innuttaasunit amerlaqisunit taper-serneqaqqammersoq inuit akornanni annertuumik akerliunermik pilersitsisinnaassasoq".¹

"Akuersaanngilluinnarnerup" atorunnaarsinnissaanik apeqquut 2013-imi Inatsisartunut qinersinermi annertuumik sammineqarpoq. Naalakkersuisut isumaqarput qinersisartut isummernerat pimoorunneqartariaqartoq, taamaattumik Naalakkersuisut tamanna naapertorlugu iliuseqarnissartik pisussaaffittut isigaat".²

2)

Qaqugu qanorlu Naalakkersuisut pilersaarpat innuttaasut uranimik piiaanissamut isummissasut oktobarip arfineq-pingajuat sioqqullugu, ulloq taanna Inatsisartut akuersaanngilluinnarnerup atorunnaarsinnissaanik isummertussaammata?

3)

Naalakkersuisut qaqugu pilersaarutigaa uranimik piiaanerup kingunerisassai pillugit nalunaarusiat marluusut innuttaasunut saqqummiunneqassasut?

Apeqquut 2 aamma 3 Aatsitassanut Naalakkersuisup apriliip 30-anni oqaaserisai tunngavigalugit paasineqassapput:

"Arlaannaannulluunniit attuumassuteqanngitsumik akuersaanngilluinnarneq atorunnaarsinneqassagaluarpat allanngortinneqassagaluarpalluunniit tamatuma kingunerisinnaasai pillugit nalunaarusiamik suliaqartoqarnikuuvoq. Taamatuttaaq suleqatigiissitamik qallunaanik kalaallinillu inuttalimmik pilersitsisoqarnikuuvoq, isumannaallisaanermut, iliussissatigut nunallu pissusaa tunngavigalugu politikikkut aalajangiinissamut apeqquutit erseqqissaaviginissaat siunertaralugu, tassanilu aamma naalagaaffeqatigiit tamanna pillugu ataatsimut isummiussinissaat eqqartorneqassaaq. Siunniunnikuuara nalunaarusiat taakku tamanut saqqummiunneqarumaartut ullumikkutut isikkoqartillugit, imaluunniit teknikkimut tunngasortai minillugit, taamaalillutik innuttaasut killiffigisagut assigiinngitsut pillugit isummersinnaassammata".³

¹ § 37 akissuteqaat nr. 26

² § 37 akissuteqaat nr. 127

³ § 37 akissuteqaat nr. 26

4)

Nalunaarusiat eqqaaneqareersut taakku imarisaat Kujataani innuttaasunik ataatsimiisitsinerni ingerlanneqartuni saqqummiunneqarumaarpat piffissarlu qanoq annertutigisoq innuttaasunik ataatsimiisitsinermi killilersugaanngitsumik oqallinnermut atorneqassasoq Naalakkersuisut naatsorsuutigaat, tassani pingaartumik eqqarsaatigalugu ataatsimiisitsinernut nalunaaquttap akunneri marluk Naalakkersuisunut ilaasortat pingasut oqartussaaffigisaminnik saqqummiussiffittut atuinissaannut immikkoortinneqarsimanerat?

Tungavilersuut:

Akuersaanngilluinnarnerup atorunnaarsinneqarnissaa pillugu siusinnerusukkut Naalakkersuisunit oqaatigineqartartut imminnut atassuteqarnerat takujuminaappoq. Pingaartumik Inatsisartut aalajangiinnginnerini sammisaq pillugu innuttaasut peqataatinneqarnissaannik pilersaarutit eqqarsaatigalugit. Tamanna ilutigalugu aamma ernumartumik ersertarpoq Naalakkersuisut partiitut isummat apeqqutillu inuiaqatigiinnut attuumassutillit akulerussuukkaat.

Qinnutigeriissavara apeqqutit tamarmik ullut suliffiusut qulit iluanni akineqariissasut.